

qualitate per influentiam procedente. Nec tamen  
 duæ qualitates, sed vna, à cælo quæ est causa vniuer-  
 salis & à causa particulari producta. Sunt enim cau-  
 sæ inuicem subordinatæ respectu eiusdem effectus  
 & causæ effectiuę. Sed quomodo possunt cōcurrere,  
 quin sit vna superflua? Si enim causa particularis ad  
 producendum sufficiens est, quid confert causa vni-  
 uersalis? Si enim Sol non esset, quare ignis stupam  
 non combureret, aut quid ad combustionem cōfert  
 Sol igni? Sed iuxta modo notata omnis potentia a-  
 ctiva particularis ab vniuersali causalitate cæli de-  
 pendet, vnde & intimius penetrat virtus cæli, quàm  
 agentis proximi: quoniam plus influit causa prima,  
 quàm secunda. Et quanuis cælum coagat agēti pro-  
 ximo, vt simul in effectum qualitatem aliquam &  
 proprietatem inducant: nihilominus à cælo speciali-  
 ter influitur aliquid nobilius, ad quod virtus parti-  
 cularis non attingit. Cælum etiam cessante actione  
 particularis agentis, effectum in esse conseruat, alio-  
 quin absque cōseruante corrumpetur. Sed obstare  
 plurimum apparet (quoniam celestis influentia non  
 est causa immediata, cōstat, sed mediata) quomodo  
 mouet, an necessario vel cōtingenter: vtpote si Sor-  
 tes ex constellationis ratione, magnus est futurus:  
 quis ad hoc media procurabit, an à cælo mouetur,  
 vt studeat & laboret, an ab arbitrio libero? Dicimus